



SAUNOAGA AUTU ALE AFIGGA TUALA TEVAGA IOSEFO PONIFASIO
AFIGGA ILE SUI PALEMIA / SUI MINISITA OLE SOIFUA MALOLOINA
O LE POLOKALAME O LE
“FA’ATAUAINA O LE SOIFUA MALOLOINA O LE MAFAUFAU”
EFKS, AAI-O-NIUE I LE 3:30 ILE AOAULI

**Lau Susuga le Ta’ita’i o le Sauniga,
Lau Susuga i le Faifeau Toeaina, Susuga i le Fa’afeagaiga
o le EFKS i Aai-o-Niue nei, Rev. Efu Efu,
Sui Mamalu o le Kapeneta,
Le paia o Sui o Malo Aafaatasi,
Ta’ita’i o Matagaluega ma Faalapotopotoga Eseese,
Paaga uma a le Soifua Maloloina,
Le mamalu o le Ekalesia nei i Aai-o-Niue, i ona tupu ma e’e faapea ma le
potopotoga,**

O paia ma mamalu, o lā le Atua ia, aua o Samoa ua uma ona fa’ataotooto ana tofiga.
Nu’unu’u atu ia fa’atini o tausala.

Ua tala mai le lagi le mamalu o le Atua, o lē e ou vi’iga na sa’afi ma talatala i ai le
susuga i le fa’afeagaiga toeaina. Mua ia le fa’apolo i le taliuta, aua o le Atua o Samoa
ma lona vi’iga.

E fia momoli le agaga fa’afetai i lau susuga i le toeaina, mo le taulaga osi o lenei aso,
ma fa’anōnōmanū ai aua lenei fa’amoemoe taua. O le Atua pulepule tetele na te
fa’afo’i le mau e tele i lau Susuga aua faiva o tapuaiga mo si o tatou atunu’u.



O tausaga ta'itasi i le aso 10 Oketopa e fa'amanatuina ai e le lalolagi e aofia ai ma Samoa, le Aso Faapitoa o le "Fa'atauaina o le Soifua Maloloina o le Mafaufau".

Ua tolu ai nei o tausaga, ua fa'amanatuina ai e Samoa lenei aso fa'apitoa i le vaiaso atoa. E amata atu nei e tau le Aso Tofi, 10 Oketopa, ua fa'aalogaina ai e Samoa lenei vaiaso taua. O le sini autu o lenei fa'amoemoe, ina ia fa'aauau ona tapisa ma talanoaina le taua o le soifua maloloina o le mafaufau.

O le anavatau po'o le sini autū o lenei tausaga, ua ave le fa'amamafa i le 'Soifua Maloloina o le Mafaufau i Totonu o Fale-faigaluega'. O le fale-faigaluega, o se nofoaga po'o se vaipanoa lea o lo'o tele ina mafuta ai tagata faigaluega i aso uma. E ave ai lana fa'amuamua ona o lo'o maua mai ai le alagātupe mo le tausiga o lona aiga. O lo'o mafai ona fa'aauauina ai le maua o tomai ma agava'a, ma toe si'itia ai le malamalama. E mafuta ma feiloa'i ai le tele o tagata eseese. O le nofoaga e tausi ina ia mamā lona si'osi'omaga, ma ia mautinoa o lo'o fa'atino galuega a le afaigaluega ina ia si'itia tupe maua a le fale faigaluega.

Ae pe'ita'i e tele ina galo ona talatala ma tali le fesili – "O a mai oe?" O tua atu o lenei fesili o lo'o afifi ai i totonu le 'anofale o le fale-faigaluega, o le mafaufau manuia o le tagata faigaluega. Po'o le a le lelei o le totogi, mautū ta'iala ma faigafa'avae, lelei le tino-i-fale o le fale-faigaluega, ae a a'afia le mafaufau o le tagata faigaluega, e faia fua le galuega. A la'ititi fo'i le totogi e le tusa ai ma le galuega fa'atino, e ono o'o ai ina a'afia le mafaufau, ona ua tele mea fai ae le lava le fa'asoa. Ona fa'asolo ai lava lea i le li'o lea, ma ono o'o ai ina le faigaluega le isi tagata, ona o a'afiaga o le mafaufau. O se fa'afitauli fa'amata e le o iloa atu, ae se'iloga ua talanoa ma fa'asoa ai, ona fa'atoa lagona lea e le tagata o le mea moni o lo'o tupu.

Ua to'atele tagata ua a'afia le mafaufau ona o le tele o mafua'aga. O se mataupu e tele ina lē amana'ia ma leai se fa'amamafa. O le to'atele o tagata ua a'afia le mafaufau, fa'atoa iloa lava ona ua i ai foliga va'aia, ma ua o'o i o'oo'oga. Ae o le to'atele o lo'o a'afia, e le o mafai ona iloa ona o mafua'aga e pei o le; leai o se malamalama i āuga o le a'afia o le mafaufau, o le māasiasi ona o le tusitusilima ua le mafai ona alu e saili ai se fesoasoani, ua fai ma vaisū tu ma aga o lo'o mafua ai e pei o le tagofia o le ava malosi ma laau faasaina, ua leai se lagolago a aiga, matua, nu'u ma le ekalesia. I totonu o le fale-faigaluega ua leai se lagolago a le pule, o tagata faigaluega, faapea isi tagata.



O le to'atele o lo'o noanoatia ma tutupu ai fa'afitauli e pei o le sauāina i totonu o aiga, nu'u po'o le fale-faigaluega. Ona tupu ai lea o le musuā e talanoa ma fa'asoa e saili fesoasoani. Ua sili atu le mā ma fefe e talanoa atu ona o le popole i le tusitusi lima, ma ua leai se fa'atuatuaga o nisi tagata e ono maua ai le fesoasoani. O nisi o āuga o le mafaufau ua a'afia, a tele galuega ona saili lea o le mea e mapu i ai e pei o le tagofia o le ava po'o laau fa'asaina e tua iai. Ae peita'i, o ī tonu o lo'o amata ai lava le vaisu ma le masani lea ma ono o'o ai i se tulaga ua le mafai ona tu'u, ma i'u ina a'afia ai le mafaufau.

O fa'amaumauga lata mai i totonu o Samoa, o le toatele lava ua a'afia mafaufau e mafuli aga'i i tupulaga talavou. Ona o le tele o fesuiaiga o tu ma aga, o fa'alavelave i totonu o ā'oga, o āiga, fa'apea ma fale-faigaluega, o lo'o mafua ai le tele o a'afiaga o le mafaufau. O le to'atele o i latou ua maualuga le tulaga o le ono a'afia ai o le soifua maloloina o le mafaufau e mafuli i le itupa o ali'i mai le vai-tausaga 30 aga'i luga le matutua. O le to'atele foi, e nonofo i nofoaga tu taulaga.

O nisi o tupulaga talavou e i lalo ifo o le 30 tausaga le matutua o lo'o faamauina le a'afia o le mafaufau ona o le tagofia o le ava malosi, ma e le faigaluega. E tusa ai ma fa'amaumauga, o le to'atele o tinā ma tama'ita'i ua o'o le tulaga o le a'afia o le mafaufau pe a fa'atusa i ali'i. O le popolega, ona o nisi ua a'afia le mafaufau ua o'o ina a'afia ai le soifua, aemaise lava i le tulaga o le pule i le soifua.

O nei fa'amaumauga, e fa'amausalīina ai le tatau ona una'ia ma ave le fa'amuamua i le soifua maloloina o le mafaufau. E le gata i ona a'afiaga, ae o mafua'aga fa'avae e ala ai ona fa'atino e tagata soifua tu ma aga ma o'o ai ina a'afia.

Ua tele taumafaiga a le Malo o Samoa e tauala atu i le tatou Matagaluega o le Soifua Maloloina ma ana pa'aga galulue, ina ia una'ia le soifua maloloina o le mafaufau. E ui ua i ai ta'iala ma faigafa'avae e ta'ita'itama ai le galuega, o auaunaga e pei ona iai togafitiga ma fa'atalatalanoga, o fa'alauiloa ma polokalame i nu'u ma afio'aga. Ae peita'i, e le o mafai ona fa'aitiitia ai le tele o fa'afitauli.



O le agaga maualuga, e manuia a tatou taumafaiga, pe afai e lalago fa'atasi tagata uma. O se mafaufau manuia e afua mai totonu o aiga, ekalesia, nu'u, fale-faigaluega ma le Malo. Ia tatou opogi fa'atasi ma fa'asoa, ia taofi le tusitusilima ma le fa'alumaluma, ia saili avanoa e lagolago ai so'o se tagata soifua. Ae aua le sili musa ia tatou ona toso i lalo le isi uso a tagata ma ana taumafaiga. Po'o totonu o le fale-faigaluega, o ekalesia, totonu o le aiga, e taua le galuega a ta'ita'i, o matua, o matai, fa'apea ma le lagolago a tagata ta'ito'atasi, ina ia manuia tagata uma, ma ia sapaia mea uma i le alofa. O le alofa lea o le Atua e lē fa'atuāoia.

E momoli le fa'amālō i le lagolago a tatou pa'aga galulue, o ekalesia, o so'o se fa'alapotopotoga fa'apea nu'u ma alalafaga aua lenei fa'amoemoe taua.

E tatalo atu ai i le paia ma le mamalu o le auvala'aulia, ina ia fa'ailoa lau lagolago e ala i lou auai i le "Savali mo le Mafaufau Manuia", Aso Tofi, 10 Oketopa 2024, e amata atu luma o le Ofisa o Tinei Mu fa'asolo atu luma o le Maota o le Malo i Matagalalua i le 7.30 i le taeao.

Manuia tele toe taimi o le Aso Sapati Paia o le Atua soifua. Faafetai

Soifua ma ia manuia !!

